



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8 Yangia anidakangma : Tir Yimyim tiryimyim@aolima tir yimyim **TAPAK 3**



Malaysia Masters: PV
Sindhu final-i iogo

PDP nung inyakertem nem vote
magütsüdaktsü: Mehbooba Mufti

VOL. XXI ISSUE NO. 223 (ADOK 223) DIMAPUR AMUNGNÜ (SUNDAY) MONUPII (MAY) 26, 2024 ₹ 5.00

Aor kaketshir 16-i N. I. Jamir Academic Excellence Award agizükogo

Kohima, May 25, 2024 (TYO): Nagaland Board of School Education kubok HSLC tatiang nung Top-20 jenjang angur Aor kaketshir 16 nem 18 buba N. I. Jamir Academic Excellence Award agütsüo.

Taküm iba sempet angurtem ya Moamenla B. Kichu (Aliba) & Benjungakum Jamir (Merangkong) - 9th; Chendila Walling (Khar) & Suyaben Longkumer (Ungma) - 10th, Tajungen Imsong (Longjang) & Moaakum T. Longkumer (Dibua) - 12th, Aiensen Aier (Mopungchuket) - 13th; Imlibong Jamir (Sungratsu), Nukshirenla Kichu (Khensa), Tiarenla Longkumer (Merangkong) & Tiainla (Dibua) - 14th; Imkongsungit Jamir (Merangkong) Liropong Ao (Khar) & Imkongsenla



Longkumer (Changtonga) - 17th; Imjunglila Jamir (Khar) - 19th aser Temsuujungba (Khar) - 20th nunger lir.

Kohima Ongpangkong Telongjem (KOT)-i Capital Convention Centre nung ayongzüka agiba sentong nung Fisheries & Aquatic Resources Advisor A. Pangjung Jamir-i takok angur nem bouquet, kulikaket aser Rs 10,000 senpet kaka agütsü.

"Takok tajung angutsüba ya

tezüba masü aser tajungtiba akümtsü merangba ajanga asenoki tajangzük angur" ta Advisor Pangjung-i ashi.

Tanü kanga kara ainba putu nung Science & Technology melenhidang lanurtemi sobaliba aser inyaksangshi wazuka ayutsüla ta pai ashi.

"Alima nung lisopur aika lir saka asenok Aortem ya maongka tulu angurtem lir kechiyong asenok sobaliba aser inyaksangshi khenyongi balaka

aser iba jagi yimya-awashi meteter ka ama akhümtsübur" ta Pangjung-isa ashi.

Asen maitü teti kümzüka aser wazuka ayutsüla aser sobaliba subotsü o osettem ajanga pei maitü jangjadaktsür, ta paisa ashi.

Aortem tsüngda jayajoko balaka lir saka tanü lanurtem English mesüra Nagamese oshitem jembir saka lanu putui Ao oshi amshitsü ayongzüker, ta Advisor Pangjung-isa shisem.

Asür N.I. Jamir ya sorkar

nung tematiba menden Chief Secretary inyak aser iba sülen politics nung tetsüng ajemoker Cabinet Minister ka ama inyaka liasü. Pai state sorkar ketcangsür ka ama inyakdang ENPO aser Sumi tesemtem nung teimba inyaka liasü. Pa ya Aor asoshi dang masü tanga kintem asoshi lennir tajung ka liasü, ta Advisor Pangjung-isa metedaktsü.

Iba sempet ajanga kaketshirtem maneni tazüngba nung takok tulu angutsü ajungmesotsü imlar ta paisa ashi.

Iba sentong nung Kohima Ao Telongjem president T. Chubayanger-ia lanurtem ayongzüka jembi.

Sentong nung KOT president Alemkümzük-i tesentepertem pelaa agizü aser Convenor NIJT Board of Governors Nochasashia sempet indang metedaktsü.

Mokokchung Langpangkong Senso Telongjem pur yimkong senden aka



Er. Toshikaba

Marsanen Imsong

Mokokchung, 25th May (TYO): Langpangkong Senso Telongjem Mokokchung (LSTM) pur yimkong senden 25th May, 2024 nü yangi Mokokchung town hall nung takok manung kaoga.

Sentong nung Executive Engineer, PWD (R&B) Mokokchung, Toshikabai tayongzüka ojembidang, taküm liyonga aotsü asoshi United Nations-i 2015 küm 'Sustainable Development Goals (17 SDGs)' ta sur mangdang ka yanglua alima tesembalala nung maparen inyak tenzükogo, aser iba nungji tongtibang onük 17 keta lir. Ibaji junger ta sur India aser Nagalandia agizükogo. Onük 17 nung ya taküm libaliru ajak sentaka lir aser ibaji 2030 tashi nung atongtsü merangba ka lir, ta ashi.

Iba SDGs mangdang ya district level nungi tenzüka yimdar yimtsüng tashi nung (Maneni tapak 2 nung...)

Nagaland Police-i drugs aika puogo: Y Patton

Dimapur, May 25, 2024 (TYO): Patton-i ashi.

Director General of Police, Rupin Sharma, IPS-i anir Nagaland Police-i tawa drugs aika puogo ta Deputy Chief Minister aser Home and Border Affairs in-charge Yanthungo Patton-i metedaktsü.

Nagaland Police-i Rs 16 crore shi alang drugs puogo ta Y

Iba atema parnok nem tenüngsang agütsür aser asen police ajanga Nagaland ya drug shibelenertem aser ayokertem asoshi tesem ka masü ta sayuogo" ta Y Patton-i metedaktsü.

Paisa nübor tem dang Nagaland Police den "War Against Drugs" atema longjemer yariteptsü ayongzük.

EC-i 2024 Lok Sabha elections atema voter data metedaktsür

Guwahati, May 25, 2024

(Agencies): Election Commission (EC)-i Honibarnü 2024 Lok Sabha elections indang shilem 6 nung 'total number of voters' osang metedaktsü.

Lok Sabha election shilem tatembangba June 1 nü agitsü lir aser tanü shilem 6 buba agidang ECI-i iba osang metedaktsü.

Supreme Court nung elections agiba sülen 'detailed voter turnout

data, votes cast & rejected'

indang petition balala angadangba sülen lemtet ka agia liasü. Ken o benokertem Election Commission dang voting phase shia website nung iba data sayutsü atema asüngdanga liasü.

EC-i iba mapa shitak inyaker aser April 19 nungi elections tenzükba sülen nungi turnout data sangdongtsü mapa inyaka arur ta ashi.

EC indang app nung polling day anepdang 9:30 ako nungi voter turnout data agüja arur. Iba app ajanga nikongdang 5:30 ako tashi ghonda ana shia estimated turnout agütsür aser ibaji aonung 7:00 ako sülen polling party tem meyipa aruba tashi agütsür ta ECI-isa ashi.

Ayaterm tashi nung iba app ajanga 'Close of Poll' (COP) data tajungtiba sayur, ta ECI-isa ashi.

Koba mapasüdir nüburia aginübaama ochishia inyaktsü: R. Asangla

Mokokchung, 25th May (TYO): Tanü alima nung ochishir, jembiba ama mapa kuma inyakba aser nüburtemi tamang katetba lenir tensai akanger, ta shisateta iba maongka tajung agia ULB election nung noktaker, ta

Mokokchung Municipal kubok Ward No. 4, Artang Ward, Mokokchung nungi candidate Yongkongsangla-i

osangbener senden ka nung metedaktsü. La dang ajaki R. Asangla ta dang ajar. Mokokchung ULB election nung Artang Ward ya tetsü reservation kuboki arur.

R. Asangla ya Süngratsü nunger asür Repakokbar jala lir.

Award senpetja lir.

Nüburtemi yaria la adoktsüra, "kechi mapa südir süaka merüka (transparency lia) Artang Ward yimden tawabangba kubok nüburtemi mulungba nung ochi shia inyaktsü kü tejangraba aser telemtetba lir", ta lai ashi.

Mokokchung town ya taoba mapangbo town committee ka dang liasü, tang ya jenjang tera ajungketer municipal council yimya nung bener aoba den ano tetsür nem yimli agütsü nung, iba maongkajii agia alima yanglutsüba nung tetsür shilem tulu lir ta angateta ochi tangatetba nung inyaktsü mulungtetba indang laisa shisem.

(Maneni tapak 2 nung...)

IMD-i Red Alert sangdonger

Dimapur, May 25, 2024 (Agencies): India Meteorological Department (IMD)-i May 27, 2024 nü Nagaland, Manipur, Mizoram aser Tripura atema Orange Alert (Be Prepared) sangoktsügo aser iba ya tziünglu kanga arutsü atema lir.

May 26 nü Gangetic West Bengal aser Assam o Meghalaya atema May 27-28 atema Red Alert sangoktsügo.

Cyclone Remal ajanga item state nung mopung tesashi aontsü aser Red Alert tetezü

Warning (Take Action) lir.

May 26 nungi 28 tashi Nagaland, Manipur, Mizoram aser Tripura atema Orange Alert (Be Prepared) sangoktsügo aser iba ya tziünglu kanga arutsü atema lir.

May 26 nü Gangetic West Bengal aser Assam o Meghalaya atema May 27-28 atema Red Alert sangoktsügo.

La ya Christian Higher Secondary School, Artang Ward, Mokokchung nungi tesayur mapa küm 20 shi inyaker.

La ya tenendak tesayur ka lir, iyongji la sempet tajung ajiteta 2015 küm Sub-divisional Teachers Award aser 2021 küm State Teachers

La ya Christian Higher Secondary School, Artang Ward, Mokokchung nungi tesayur mapa küm 20 shi inyaker.

La ya Christian Higher Secondary School, Artang Ward, Mokokchung nungi tesayur mapa küm 20 shi inyaker.

(Maneni tapak 2 nung...)



Yongkongsangla

Balvatika & Jadui Pitara dang sendakba nung sentong agi



Dimapur, Monupii/May 25 (TYO): Balvatika aser Jadui Pitara dak sendakba nung Livingstone Foundation International nung May 24 nü state kübok CBSE Schools tem atema anogo ka asoshi consultative senden ka menogo. Iba sentong nung state kübok CBSE school 20 nungi nisung 54-i shilem agia liasü.

National Curriculum Framework's Foundational Stage (NCF-FS) dak sendakba nung tangazükba agütsütsü atema CBSE-i inyakyim balala benoka inyakba nung iba sentong ya shilem ka liasü. NCF-FS ya foundational stage atema New Education Policy (arishi küm 3-6) ajak dang tongtibangtiba rongung ka lir.

Iba senden ya hybrid mode nung agi, kong Nagaland kübok CBSE nung affiliate süa aliba

school tem offline aser online mode ajanga shilem agia liasü.

Offline senden koba LFI auditorium nung agia liasü, iba ya Principal, Delhi Public School, Dimapur Anurodh Chitra lenisüba nung agi aser online mode koba offline mode den külemi agia liasü, iba ya NCERT aser CBSE naprongla nungi shisalen sayurtemi anir agia liasü.

Senden ya school tem nung Balvatika akangshitsüba, foundational stage nung Jadui Pitara tangazükba agütsütsü atema hadir ka ama amshitsü, Jadui Pitara aser SCF dak sendakba nung material ka mejeta benchmark asüba, e-Jadui Pitara, Curricular Goals aser NCF-FS kübok Learning Outcomes, foundational stage atema NCF-i benoka aliba pedagogies indang shisatsü,

Jadui Pitara indang CBSE Centre of Excellence (CoE) specific customization dak sendakba nung tinyaktsü, NCF-i tuyuba ama assessment practices lemsateptsü aser CBSE-i agütsüba NCF-FS dak sendakba nung Capacity Building Programme indang osang lemsateptsüba amala onük dak rangloker agia liasü.

Senden nungsa Livingstone Foundation International mendenbuba Dr. Andrew Ahoto Sema-i, senden dak sendakba nung pa tebilemba lemsatep aser CBSE schools balala nungi shilem agirtem dang parnoki shilem tajung agia iba sentong takok ngudaktsüba atema kanga pelaba lemsatepa liasü.

Iba senden nung Director, All India Private Schools' Alliance (AIPSA), Shiju Augustine-ia shilem agia liasü.

Dimapur nung mejangjaba tasümang ka nguteta lir

Dimapur, Monupii/May 25 (TYO): May 24 nü 1530 ako shi nung NST Bus Station, Dimapur nung mejangjaba non-local tebur ka süjia or aliba osang Police Station, Dimapur-i agizüka liasü.

Iba osang dak ajemdaker duty party iba tesemi aritepa ao aser arishi küm 20 nungi 25 tsüngda asütsü ta bilemba nisung ka süjia or lia nguteta liasü.

Iba sülen duty party-i iba nisungba ya District Hospital

Dimapur-i temang anepalutsü anir ao, ajiüaka 1603 ako shi nung pa asüba osang Medical Officer-i agüja liasü. Tasümang dak sendakba nung bushisüngdang ka agiogo. Asüsang ya meshimetsür ka asütsü aser pa ya yatzür agi asü asütsü ta bilemer.

Temzüng ozüng dak ajemdaker tinyaktsü maparen ajak tembanga inyakba sülen asüsang ya PM examination/

identification atema District Hospital Dimapur Morgue-i benerogo.

Asüsang yagi t-shirt tanak, jean tanak aser flip flops ali sentsü ka semer liasü.

Ken o dak sendakba nung kinunger aser medemertem dang Officer-in-Charge, East Police Station, Dimapur (Mobile No. 7085055020) den tongteprateptsü mepeshia metedaktsügo.

Mkg Langpangkong Senso Telongjem pur ... (TAPAK 1 NUNGI...)



Joko teinyaktsü ajak agi asen lima talisa Langpangkong lima ali peria lir aser ali tajung asünung tsünusempong kechisarena ajak ajunger, anungji, ali dangi meyiptüla, ta pai tayongzükba ka agütsü. Asenok perir ang tangular dang dena yoktetsüsa züsentettsüla, ta paisa shisem. 17 SDGs nungji shinga tesülen tetoktsü, ajak lirumedema anir/ amer aotsüla ta shia lir, anungji, iba tangatetba nung lirumedema aotsü asoshi paisa ayongzüksem.

Sentong nung tepela o jembir Ao Senden tir, Marsanen Imsong-i jembidang, Langpangkong nunger aküm nung Ao kini pa nem Ao Senden tir inyaktsü yimli aser maongka agütsüba asoshi pelaba den nübur mulung chidakja Ao kin tejakleni anitsü mulungteter apusor, anungji, mapang ajak

nung khuret tongittea yariteptsü asoshi paisa mepishia metedaktsü.

Langpangkong Tzükong Mungdang tenzükhang tsüraburtemi "lenmang aser telongjem" omen dak rangloker aru. "Lenmang" ta asübaji par tongmelang putu nung "motor lenmang" dak ranglok, saka tanü putu tasenba nung "lenmang aser telongjem" ta asübaji lenmang ajak nung – kaketshisatsü bushiba, rongsenketzung, amalitepba, nungittepba, telongjem aser tekümtet lenmang, item ajak dak rangloker arur, anungji, asenokia iba nungji tongti shilem agitsü aser maparen ajak nung azüngashia inyaktsü pai ajungshia liasü.

Mokokchung nung terenlok tsütsü teinyaktsü wadang aika

anendaka lir, itemji inyaka aotsü, anungji, nüburtemi shisatsü aser sarasadem nung nungittü paisa mepishia metedaktsü.

Langpangkong tzükong nung balaka (unique) ta asüba kajji Phom aser Chang yimtem densema lir, anungji, parnoki mezüngtoki maparen ajak nung amshitsü asoshi paisa ajungshia liasü.

2024-2027 kümşük asoshi LSTM ketcangpur itemi shimiteta liasü – Tir – N. Imna Pongan (Asangma), Tatong Tir – Imkongtemsu Jamir (Chuchuyimlang), Tongti Zülur – Dr. Imliwati (Akhoya), Repsem Zülur – Moatemsu (Chakpa), Senotsü Zülur – Imaküm (Unger), Repsem Senotsü Zülur – Imlisunep (Kangtsüng) aser Senyur – A. Kika Jamir (Mongsenyimti).

CPO-i World Environment Day nü süngtong atemtsü tuyu

Dimapur, Monupii/May 25 (TYO): Chakhesang Public Organisation Executive Council-i, alima tzümopung wazüka ayutsü nükjidong nung bangzüng ka agizükogo. Tzü mopung wazüka ayutsü aser ajak longjemer inyakba aser alima tajungba küma yanglutsü atema iba telemtetba ya kanga tongtibang lir, ta CPO-i ashi.

"Anungji iba dak sendakba nung kin ajungai küm shia June 5 nü World Environment Day amungba mapang süngtong atemtsü telemtetba agiogo," ta kasa sangdong ajanga metedaktsü.

Iba dak sendakba nung CPO-i, Chakhesang nunger aliba yimtsüng ajaki parnok temeket nung June 5 nü World Environment Day amungba

mapang süngtong atemba sentong ayongzüka agitsü tetuya agütsügo.

Yimtsüng shia nung süngtong atemba sentong ayongzüka süngtong ishiba agi 500 bosa atemtsü aser ajia asen ali aser tzü mopung den apetba indigenous species tem tongtibangsa atemtsü metedaktsügo. Maneni highway ajanga süiba yimtsüngtem dang taoba küm atemba süngtongtem temeket merektettsü aser kümzüka toktsütsü mepeshia metedaktsügo.

Kasa mapang nung CPO-i, yimtsüng nung lenirtem dang lanur, kaketshir lokti tentet, tetsür lokti tentet aser local self-help groups tem anisemer iba mapa takok ngua inyaktsü mepeshia metedaktsügo.

Assam Rifles-i sentong balala ayongzüka agi

Dimapur, Monupii/May 25 (TYO): Meri Life Amplification 2024 nung shilem ka ama May 24 nü Assam Rifles "Drug Abuse" dak sendakba nung Lampstand Higher Secondary School, Toluvi, Dimapur nung awareness lecture ka ayongzüka katsüogo.

Kasa mapang nung Mon district kübok Aboi yimtsüng nunga temesepba mozü achiba dak sendakba nung lecture ka ayongzüka katsüogo.

Temesepba mozü achiba ajanga timtem bener arutsüba indang tangazükba agütsütsü nükjidong nung iba sentong ayongzüka katsü, koba jelia nokdangtsü aser tanepstsü bushitsü asoshi inyakyim balala dak rangloker agiogo.

Sentong nung o jembirtem temesepba mozü achiba ajanga lokti, tekolok, shitemang aser rongsenketzung nung takoksa ajunruba indang lemsatep. Sentong nung kaketshir 90 shi aser tesayur troki shilem agia liasü.

Yimtsüng ketcangsürtem aser kaketshirtemi AR dang kanga pelaba lemsatepogo. Sentong nung shilem agirtemi temesepba mozü achiba anema nokdaktsü tenangzükba agia liasü.

Koba mapasüdir nübur... (Tapak 1 nungi...)

Municipal Act ya asenoki jembiba dak alaka ano mapa inyak metenzük, ibai Act tasen nem tangazükba agütsütsü nükjidong nung iba sentong ayongzüka agiogo. Iba sentong nung kaketshir 150 aser tesayur 10-i shilem agia liasü.

Sentong nung kaketshirtem

dang libaliro tajung benshitsü aser temesepba mozü achiba

liasü.

Temesepba mozü achiba ayimsüngä prokshia aoba den raratsü atema kaketshirtem nem tangazükba agütsütsü nükjidong nung iba sentong ayongzüka agiogo. Iba sentong nung kaketshir 150 aser tesayur 10-i shilem agia liasü.

Sentong nung kaketshirtem dang libaliro tajung benshitsü aser temesepba mozü achiba

liasü.

"Kiyong nung tetsür jenjang aser tia balala asadanger tensa den apet maparen karbosa inyaktsü kü tejangrabla lir", ta iba osangbeneri tetsürtem atema kechi inyaktsütsü tebilemba lir? ta metetnúa asüngdangba ka langzüdang metedaktsü.

"Ner kiyong atema kechisa inyaktsü?" ta asüngdangdang,

"teinyaktsüji aika lir saka tenüng teta mashir saka tensa den apet nungdakbatem apiteta inyaktsü

aser sarkar nungi kechi

asen lima yanglutsü tamendakdak südaktsünür", ta laisa ayongzü.



May 25, 2024 nü South Kashmir kübok Kulgan district nung aliba polling booth ka nung vote agütsütsü atema nisungtem tarense na nokdanga aliba noksa nung angur.

NASA-i India nunger astronauts nem Advanced training agütsütsü: Garcetti

New Delhi, Monupii/May 25 (Agencies): Taküm mesüra sangküm imlar. Iba ya International Space Station joint mission atema kobi melii NASA-i India nunger astronauts nam advanced training agütsütsü, ta US envoy to India Eric Garcetti-i metedaktsü.

Hokolbarnü Bengaluru nung US-India Business Council (USIBC) aser US Commercial Service (USCS) nati ayongzükba "US-India Commercial Space Conference: Unlocking Opportunities for US & Indian Space Startups," nung jembidang Garcetti-i,

"Longjemer International Space Station-i atutsü nükjidong asoshi NASA-i kobi melii India nunger astronauts nem advanced

training agütsütsü. Taküm mesüra sangküm imlar. Iba ya asen lenirtem tenangzükbatem rongnung ka lir," ta metedaktsü.

Garcetti-isa, "Kobi melii onoki ISRO indang Satish Dhawan Space Center nungi NISAR satellite khakettsütsü

koba ajanga resources, alima

tawa, tzü-mopung lendong,

tzüyim nung tzü level aser rürjep

mita reprangtsü," ta Garcetti-i

metedaktsü.

NISAR ya NASA aser Indian Space Research Organisation (ISRO) na indang külem mission ka lir.

Bengaluru nung ayongzükba anogo ka piyong senden nungi US aser India sorkar naprongla nungi tongti kettangsertem, Indian Space

Research Organisation (ISRO) Chairman Dr. S Somanath, National Aeronautics and Space Administration (NASA) aser National Oceanic and Atmospheric Administration (NOAA) nungi züngsemtem aden.

Kasa senden nungi Commercial space industry nungi lenirtem, industry stakeholders, venture capitalists aser market analyst tem aden.

America nungi arurtem team lenirji Defence for Space Policy Acting Assistant Secretary, Vipin Narang liasü aser Indian team nung lenirji India's Joint Secretary for International Cooperation, Vishwesh Negi liasü.

Gujarat nung TRP gamezone arongba lendong nung nisung 20 asü

New Delhi, May 25 (Agencies): Honibar nikongdang Gujarat kübok Rajkot nung TRP game zone arongba lendong nung tanur aika densema nisung 20 süogo.

Rajkot Police Commissioner, Raju Bhargava-i, iba tesem nungjagi tasümany 20 ngutetogo aser maneni bushisüngdangtsü atema tasümany hospital-i bener ogo, ta metedaktsü.

"Nikongdang TRP gaming zone nung mi adoka liasü. Kümzükba maparen inyakdar. Tangbo miji azüoktetogo aser onoki akokba tashi tasümany

miji enseptsü merangdar. Ki chirepba aser mopung sashia aonba agi kümzükba mapa inyakba nung tetsükdaktsü ajurur," ta metedaktsü.

Osang angazükba agi, mi lendong nungjagi tanur 15 dak temabo kümzükta liasü.

Gujarat Chief Minister, Bhupendra Patel-i municipal corporation aser district administration dang tekeraba nung kümzükba mapa inyaka teyari agüjang, ta tuyuogo.

Brihostibarnü Maharashtra state kübok Dombivli nunga mi lendong ataloka boiler ka apokba lendong nung nisung 11 asü.

Gaming zone arongba mokozüji kilometer 3 pilar nungia ngua liasü.

Fire Brigade kettangser, IV

Kher-i, "Miji kechi kuli ajanga

adokar onoki memetet. Onoki

PDP nung inyakertem nem vote magütsüdaktsü: Mehbooba Mufti

Srinagar, May 25 (Agencies): Peoples Democratic Party (PDP) Tir aser Anantnag-Rajouri Lok Sabha menden nungi candidate, Mehbooba Mufti-i, kuli kecha makai police-i lar party nung inyakertem aser polling agents pua vote magütsüdaktsü, ta shia longkak ait.

Anantnag nung mener longkak aitdang taoba mapang Jammu & Kashmir nung chief minister, Mehbooba Mufti-i police dang, kechiba nenoki ozü party nung inyakertem amokmerener, ta asüngdang.

Laisa, Hokolbar aonung nungi tenzüka police-i lar party nung inyakertem apu, ta ashi.

Mufti-i, tang tensa ya taoba mapang Ato kilonser Atal Bihari Vajpayee yimsüuba mapang ama masü, kechiyong paibo election timi agitsü atema inyak, ta ashi.

Mehbooba Mufti-isa, Anantnag tesem ajaklen PDP nung inyakertem pua ayu; yamai inyaktsü asübo Lieutenant Governor-i kütü dang jelia elections nung nai tetoktep, ta ashitsüla liasü, ta metedaktsü.

Mufti-isa voting machine nunga timtem liasü, ta metedaktsü.

Lai shidi ka ajanga Election Commission danga, police-i lar

party nung inyakertem aser polling agents pua ayur, ta metedaktsü.

Osang angazükba agi, Mehbooba Mufti nem jelia memetetdaktsü la indang mobile number nungi call asüba-a nokdanga liasü.

Mehbooba-i, "Tanep nungi ni phone ajanga call ka danga mesüteter. Anantnag Lok Sabha constituency nung election agiba anogo ka nung phone call nokdangba atema kū nem jelia kuli kecha memetetdaktsü," ta ashi.

Jammu & Kashmir nung Lok Sabha menden pongu lir. Jammu & Kashmir nung Arrla 370 agienba sülenbo tang mezung Mufti toktepba menden Anantnag-Rajouri constituency densema menden pongu nung election agir.

Mehbooba Mufti-i police nem tai tongloksüba sülen Jammu & Kashmir police-i, election agiba anogo nung lendong adoktsüsa tensa lir, ta osang lazükba nung ajemdaker PDP nung inyakertem apu, ta metedaktsü.

Police-isa, "Police-i nisung kar dang apu, parnok teimbaka OGWs (overground workers) lir. Election tesünep nung agitetsü atema parnok pua ayu," ta metedaktsü.



May 25, 2024 nü New Delhi nung National Commission for Women chairperson, Rekha Sharma-i polling booth ka nung vote agütsüba sülen meyipa aodang tangokba noksa nung angur.

Amongnü ayaterm nung Cyclone Remal tzüyimkülm atongtsü: IMD

New Delhi, May 25 (Agencies): Bay of Bengal nung yipru kanga tesashi 'Cyclone Remal' kümpta lir, aser Amongnü ayaterm nung iba yipru ya West Bengal aser Bangladesh kübok Khepupara na tsüngda tzüyimkülm atongtsü. IMD-i metedaktsü.

Iba yipru ya West Bengal kübok Sagar Island aser Bangladesh kübok Khepupara na tsüngda tzüyimkülm atongtsü akok.

Weather department-i May 26 nungi May 27 anogotem nung West Bengal aser northern Odisha kübok tzüyimkülm aliba district tem nung tzünglu kanga sashia arutsü, anungji state sorkartemi renema alitsüla aser angopurtem danga tzüyim nungi meyipa arutsü aser tzüyimi maotsü tuyutsüla, ta metedaktsü.

May 25 nü 12:00 ako tashi nung iba yipru ya east Central Bay

tesem kar nung tzünglu sashia arutsü.



New Delhi, May 25, 2024: Lok Sabha election shilem trokbuba agiba anogo nung New Delhi nung Election Commissioner, Gyanesh Kumar-i polling booth ka nung vote agütsüba sülen tangokba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, MAY (MONUPII) 26, 2024

Azükarutsüba lenmang

Oshi ajak nung olong shia tetezü lir. Aji oda, English oshi nunga olong shia tetezü mesüra tetenzükdk mongjen kaka lir. Iba lagi, Voice of America radio sentong ka nungi English oshi nung olong shiaji koma aser kodang nungi amshi tenzük, iba tetezü indang radio angartem asoshi "Word and its meaning" ta ser yoker. Aji oda, asen Ao oshi nunga asenoki jembiba olong shia ya tetezü kaka lir aser asenoki item tetezüji meteta asen oshi ya jembira, ibaji jangratemtsüka aser iba lagi asenok nem tangatetba kenyongi balaka agütsütsü. Aji oda, asen oshi nunga "Azükaru" ta asüba olong tetezü ya jangratemtsüka aser iba olong tetezü angateta asenoki litetra azükarutsü. Tsüraburtemi ashiba agi, azükaru tetezüji aseni aazükba, anungji aseni mapa tajung inyakba aser Tsüngremi ashiba angaa lira, iba taaji Pai asenok moatsütsü, ibaji angati anguba temoatsü ka masü saka asenoki aazükba temoatsü lir. Aji oda, ano külen asenoki mapa tajung kecha meinyak aser Tsüngremi mulungba ama melitetra mazükmarutsü. Makzükmaru tetezü asenok moatsütsüa Tsüngrem aser nisung tsüngdang asenoki kecha aazükba maka anungji temoatsü marur. Iba kasaji tanü asen taküm aser kibong nung ataloktsü. Aji oda, aseni inyakba nung azükarutsübaji lenmang ka lir, ibaji asenok mulung ajak agi Kibuba Tsüngremi mulungba ama alitsü aser inyaktsüla. Akhidang, Yihuda chuba Hezekiah mapang pa meketa tsükchir aika liasü. Pa chuba mendeni atuba mapang pa chuba yimli nung tensa mapang mejungi liasü. Par tsüraburtemi süngyanglu külem aser nübortem nem süngyanglu külemdaktsü ta 2 Putipuyang 28 nung shia angur. Aji oda, Hezekiah kodang chuba aküm, paia par tsüraburtemi külemba baal süngyangluji külemtsü koka liasü. Ajisüaka, pai par tsüraburtemi benshiba tai lenmang nungi meyip. Pai par tsüraburtemi menenba Kibuba temeshidak ki ajak meshitet aser yangji yua aliba temenen osettem ajak agiendaktsü. Aji oda, pai Tsüngrem külemdak kitem yanglushi aser pa mulung ajak agi pa külem aser Pa ozüngtem ajak shitak benshia yimsü asü. Ibayongji Tsüngremi pa azükarudaktsü, kechiyong pai pa azükarutsüa Tsüngremi ashiba anga. Ibaji Tsüngrem nungi Hezekiah aazükba temoatsü liasü. Aji oda, 2 Putipuyang 31: 20-21 nung Hezekiah chuba azükaruba indang yamai shia angu, "Hezekiah Kibuba pa Tsüngrem madang kechi tajung aser shitak aser temulung lemtettsüa liasü, aji inyak, aser Tsüngrem kidang inyakba mapa nung Tsüngrem ozüng ajak shitak benshia Tsüngrem bushi, ibayongji pa azükaru." Aji oda, Uzzia chuba yimsüsüba mapanga, kopiga pai Tsüngrem bushi, papigaji Tsüngremi pa azükarudaktsü, " ta 2 Putipuyang 26:5 nung shia angur. Atangji, nisung ajaki azükarua linür, saka kodang yimsüsür lenirtem ajaki Tsüngremi memulungba inyaker aser nübortem Tsüngrem aküm metsübui alir, iba ama mapang ka nung asenoka azükarua alitsüa asenoki maazükter. Atangji, aseni ngua nisung tamajunger aika kanga azükarua aliba asenoki angur. Idangji, asenokbo kodaser azükaru masür aser parnokbo azükarur ta asenoksasa asenok mulungjang menena bilema alitsüa akok. Ajisüaka, Tsüngremi ashir, shirnoki Pa ozüng benshir parnokji azükarudaktsütsü, saka meshitaki bendenba rongsenji manger sangwa nung ozü ama yimshia aotsü aser maazük ser nung azükarur ama aliba mapangji ken atema dang asütsü. Itemji tangari repranga lia samatsü. Alima nung asenoksasa asenoki aazükba azükaruba nung tepela aser jangratem anguba tetka konga mali. Ibaji Tsüngrem bushia Pai ashiba angaa alirtemi angur. Iba azükaruba semangji Kibuba nungi arur, anungji ibajibo shingaia raksatsütsü makok. Tsüngrem nungi masüba temoatsütem agi azükarubabo nükenbelemtsüba mapa ka dang asütsü. Item alima temoatsü nung lendong lir. Ajisüaka, Hezekiah chuba ama, shirnoki Tsüngremi mulungba inyakba ajanga temoatsü aazükba azükarur, itemjibo shitakba azükarua pelapelaa alitsü.

OLEMSABANG

Tanü Aor arogotem nung telok telemsa aika lir

~ L. Kika Pongener.

Asenoki Paul-i Korint nunger dangi züluba shiti 1 Korint-1:10-13 nung züngdangra, Korint arogo nung nisung shiai yamai ashi..."Ni Paul nubu, Ni Apolo nubu, Ni Kefa (Peter) nubu aser Ni Khrista nubu. Korint arogo telung nung arogopurtem rongnung telok pezü kuma lemsar liasü. Aji oda, Korint arogoji arogo pezü kuma lemsaba masü, saka arogo-jipo ka dang sernung, arogo telung nung telok pezü kuma lemsar liasü. Arogopur rongnung shisa obang mapu, mepetmesu tia nung liasü sudi. Yongji arogo nung Yisu Khrista noksa samadaktsür alima tashi nem arogo-ji amokbangdaktsür liasü sudi. Khristar arogo ka memesuk alima shi arogo (Liberal) ka dang mesuka kümdaktsür liasü sudi. Aji oda, arogopurtem rongnung nisung o nisung tsüngda meputepba lagi Tsüngrem o-a dena tamashi kümdaktsür liasü sudi... "Kechiyong shirnok samadagi parnok asoshi kangki o-ji (Tsüngrem o) tamashi o lir" (1 Korint-1:18).

Paul ya shiba ? : Asenok ajaki metet Paul ya bendanger (Gentiles) -tem atema balaka shimitetba Tenyar ka liasü. Anungji Paul-i Yisu Khrista osangtajungji, takar, tulur, sensaker, tilar, amitsür aser lajar ta kecha mebendangi ajunga dang küsa sayutsüngi. Paul-i sayutsüngibaji, Tekümtetji Yihuda nunger atema dang masü mimchir ajak asoshi agüja lir. Talisa, bendangertem nema taochi agüja lir ta sayutsüngi. Yongji, Yihuda nungeri Paul anema apuso sudi ta bilemer. Paul-i Yihuda nunger tashitemeter, takar, ozüngmeteter aser tezülürtem dang ashi..."Tashitemeter kong ali ? Tezülür kong ali ? Iba alima nung o rateta jembir kong ali ? Anungji ashiko, Paul sulen anidakertem ya teimba ka sensaker, tilar, meshimejunger aser bendanger (Gentiles)-tem teimba liasü sudi ta bilemer.

Apolo ya shiba ? : Apolo ya Alexandria nunger, o nung tsüngro tasong, o kanga raa jembitetba (Orator) nisung ka, lai o tarok metetba den alima shisatsü tarok metetba tashitemeter (Educated and Intellectual) nisung ka liasü. T.Mapa-18:20 nung züngra pa indang otsü tera shia angutsü. Anungji ashiko, Apolo telok, pa sulen anidakertem ya tashitemeter, tulur, takar (Educated and Intellectuals), yamala nisungtem teimba dena liasü sudi ta bilemer.

Peter ya shiba ? : Peter ya Yisu nutsüng rongnung ka, aser par Yihuda nunger sobaliba aser tejen yimsu ozüng nung akang-akanga ametba nisung ka liasü. Peter tangatetbaji, tekümtetji par Yihuda nunger atema dang...Bendangertem atema masü ta ibala tangatetba nungji akang-akanga ammeter liasü. Kenu anogo Tsüngremi Peter dang mangdang ka sayu...Su tuluka nung ayazuña shiruru tapu ajak dener alima nung tsükdaktsü aser pa dang ashi... "Peter tepsetang aser chiang, saka Peter-i langzü...Kibuba ni memeshiba shiruru koda achitsü" ? (Kechiyong Yihuda nungeri temesula rangben/mepakma aliba shiruru machir)...."Saka ola lagi ashi...Kechi oset-sa Kibubai meshitetsüogo ibaji nai memeshia ta teshi" (T.Mapa-10:9-15). Aji oda, mangdang nungji Tsüngremi Peter dang Bendangertem danga tekümtet osangtajung sayutsüngitsü indang mangdang ka sayuba liasü ta angateter. Iba anogo nungi-ang Peter-i bendangertem danga osangtajung sayutsüngitsü tenzük. Anungji Peter sulen anidakertem ya Yihuda nunger sobaliba aser tejen yimsu ozüng nung akang-akanga ametertem teimba liasü sudi ta bilemer.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züldü
bilemba ken-o ama tazüngeri angateta agitsü mepishir

Pakistan nung lokti kati Khristan ka nem tai tonglokja azük



May 25, 2024: Pakistan kübok Sargodha District Police Officer, Asad Ejaz Malhi-i, Khristan kati Muslim nunger temeshi kaket Quran shisa ta tai tongloksüba nungi ya atalokogo, ta metedaktsü.

Honibarnepe tanurtem densema Muslim nunger telok jagi Khristan kati Quran kaket shisatsü, ta tai tonglokja par ki aser pa meyong tsüngsem factory rongdoktsü.

Par ki aser factory rongdoktsüba video aika social media nung lemsatepogo. Ano nisung karibo factory nungjagi tsüngsem auyaa liasü.

Ano tanga video ka nung lokti jagi Khristan sang dakji azüker aser mezüngmeshir.

Osangbener den jembidang

densema kibong kar kümzüka anir ogo, ta metedaktsü.

Pakistan kübok Punjab province nung Home Affairs Secretary, Noor-ul-Amin Mengal-i, "Pakistan ya asenok ajak meyong lir; tamangba yimsü nung ajemdaker ozüng alema inyakba mapatemji magizüktetsü. Bushisüngdang tembangba sülen ozüng kübok aibelenertem nem temerenshi agütsütsü," ta metedaktsü.

Iba tatalokba dak sendakba nung Human Rights Commission of Pakistan (HRCP)-i X ajanga, "Sarogodha nung tatalokba osang angashia HRCP-i tebilemtsü katsür, kechiyong Gillwala yimda alir Khristantemi lendong ajurutsüa lir. Loktii nisung ka tepset ta osang angazüker," ta metedakja liasü.

Pakistan nung 'blasphemy' ozüng kübok Islam yimsü mezüngmeshiba, ainkar Muhammad mezüngmeshiba aser Quran kaket raksatsüra aibelenertem nem temerenshi agütsü.

Iba ozüng kübok Pakistan nung minorities- Khristan, Hindu, Sikh aser Ahmadi nunger nem tai tonglokja apur.

ANOGO ABEN TSÜNGREM DEN

MULUNGBA AMA SARASADEMDI

Anungji nenok anüptsü kati ka madang temenen nangzükang, aser kati ka asoshi sarasademjang. Temeshipuri sarasadembra aser inyakba nung tashi lir. Yakob 5:16

Yisu dak amangertem asoshi sarasadem ya kanga tongtipang. Mapang ajak nung saksalema sarasademtsü indang Lai O nung shia aliba angur. Sarasadem nung tashi lir, Tsüngremi asen tamang sarasadem langzüba asoshi tenüngsang agütsür. Yakobi ashibaji, 'temeshipuri jungjunga aser nendaka sarasadembra nung tashi lir' ta Yakob 5:16 nung shia lir. Sarasadem ya tashi tulu lir, saka aseni koma sarasademer aji kanga tongtipang ta metetdi. Tia tensa ajak nung tenüngsang ola den temepishiba asen mulungjang taroktiba nungi adoktsüla, aser aji asen Teyangluri angashitsüsa mepitsüla.

Ibri 5:7 nung ya zülua lir, "Kechiyong Yisui pa shi anogo nung, pa tasü nungi shibai kümzüksü akok, pa dang kanga ayimtena aser nüktü agi sarasadema mepishir külén, pai kanga akhüm tsübuba asoshi pai mepishiba angashi." Yisu sarasadem nungi asenok tangazüksü jenti lir. Tsüngremi asenok Pa chir Yisu mesüka kümdaktsüner. Tamanger aikati Yisui timtema sarasadembra ama timtemji maginer, kechiyong iba nung ya mapang endokba, ajeba aser nüktü ayimba lir. Temeimbatem, Tsüngremer nükjidong angateta alitsü sarasademji asen sobutsü kümdaktsüdi.

Haiti linük nung America nunger missionary tem tepset



Haiti nung Missions in Haiti nungi missionary, Davy aser pa kinüngtsü, Natalie Lloyd na missions indang orphanage ka nung tanurtem den tangokba noksa nung angur.

May 25, 2024: America nunger missionary tem- Davy Lloyd, pa kinüngtsü Natalie Lloyd aser Jude Montis nunger den Haiti nunger staff züngsem ka aser Arago lenir ka Haiti yimtiba, Port-au-Prince nung lanurtem sentong ka nung adenba sülen senshiba mapang nung truck asem nung auer telok kati parnok amak, ta Missions in Haiti-i Facebook page ajanga metedaktsü.

Prangpong amer telok kati gari aika auyaba sülen gari nungji mission nungi auyaba osettem oshiketa aliba mapang nungji ano telok ka aruba sülen telok ana tsüngda rara tenzüka liasü.

Aonung 9:00 ako tashi nungbo kiji arong aser Lloyds o Montis nata asü.

Montis arrshi küm 45, Davy küm 23 aser Natalie küm 21 liasü.

US nungi missionary kati, "Kechi atalokar tejangja memetet saka missionary ka khaset. Davy, Natalie aser Jude

nungeri ozü kidang nungi star link internet amshia kükü dangi call asü. Parnok yangji lia telok balalai kidangji maneni injang khaloktsü," ta metedaktsü.

Missions in Haiti-i Haiti police den tongteprateptsü merang saka tongtepratep mesütet.

Missions in Haiti-i Facebook nung parnok indang followers 4,500 dang 'yimlibilema sarasademjang' ta mepishia liasü.

Telok balala longjemba sülen parnoki police stations nung mi senoktsü, airport aser seaport shibangtsü aser jail ana kakpoka tepuokdak alir 4,000 shi chiock.

Parnokisa sorkar office tem bendoktsü aser linük yimtiba nung shilem 80 shi agiadok.

April ita nung Ato kilonser anenadokba sülen khenpiga atema governing council ka tenteta rara azüoktsü atema mapa lemzükja liasü.

Taküm March ita nung Missions in Haiti-i, Port-au-Prince kübok parnok aliba tesem nungbo tensa süngjema lir aser missionary temi parnok asütsü-a metsübur, ta metedakja liasü.

Missions for Haiti ya Davy Lloyd'er tsüraburtem- David aser Alicia nati 2000 küm tenzüka liasü. Iba mission ajanga talisa tanurtem nem chiyungtsü aser shisaliok agütsüba den külemi Khrista osangtajung lemsateper.

2002 küm nung Missions in Haiti indang summer Bible school program nung tanur 100 dak tema dena liasü aser iba küm tatembanglen tashi nung parnok indang orphanage nung tanur 10 aser school nung tanur 30 züngoksema liasü.

Missions in Haiti tentetba sülen tesüiba küm 24 tsüngda iba school nung tanur 400 dak tema züngogo aser mission-i Arago ka amenok aser bakery ka lapokba sülen yangji graduate asürtem mapa inyakdaktsü.

Ajisüaka 2022 küm nungi Haiti nung rara kanga bulua atalokba ajanga missionary David Lloyd-i tebilemtäi aka tenzüka liasü.

Iba mapang nungi David-i, "Haiti nung sorkari kecha meinyakteter aser mepetmesü tulu lir. Telok balalai nisung tepster, tashiyim amshia taküm raksatsür, auyar aser kiojen raksatsür," ta metedakja liasü.

Paisa, telok tamajung kati Missions in Haiti

atsüngdoktsüsa onoki tensa ajurua liasü, ajisüaka onoki apudaker sarasadembra ajanga Tsüngremi sayatenya mapa inyaka prangpong amer telokji meyipa oadok, ta metedaktsü.

Haiti nung tensa tamajungba akümyonga missionary temi Tsüngremi dak teimla mesamar aser parnok yarirtem dang sarasademjang, ta dang mepishir.

2022 küm David'er jabaso Davy aser pa kinüngtsü Natalie Lloyd natia Missions in Haiti nung aden. Davy ya Ozark Bible Institute nungi graduate asüba sülen Natalie den kibong aküm aser tenapriongla Missions in Haiti nung tenzüksü atema apusoa liasü.

Davy kinüngtsü, Natalie orphanage nungi inyaka lajar tanurtem anepalua liasü.

Davy aser pa kinüngtsü natia Haiti nung yimtenren tensa tamajungba akümba atema tebilemtsü lemsatepa liasü saka tenati maneni Tsüngremi tenzüksü aser lajar tanurtem aneplutsü nükjidong nung dang rangloker inyak.

Natalie-i, "Tsüngremi Pai nangzükba ama inyaker. Kodanga tamakok mangusang, anepdang shia ochisang aser tsüngküm mongpu melensiaka kodanga memelenshii kasa dang alisang dak ni kükü tamang ayur," ta lemsatepa liasü.

Hokolbar nikongdang Davy aser Natalie Lloyd na tasümaing Haiti nung aliba American embassy-i bener ao aser iba nungjagi US-i bener aotsü.

AO OSHI ANGAZÜKDAK:
TANÜ ANGAZÜKTSÜBA OJANG
**Sünganglu**

(n) süng aser ali agi tekulemtsü yangluba noksa (idol)

* Khristantemibo sünganglu mekulemer.

Süngzü

(n) süng tezü, lisü (creeper, rope)

* Ki asudang narcol süngzü kanga nüngdaker.

OLONG PAITEP # 6798

1	2		3	4	5
			6		
	7	8			
9			10		11 12
		13		14 15	
16			17		18
			19	20	
21	22				23
24					

TIPLÉN

1. Saku	- (4)
6. Songjen	- (7)
7. Mall/Tazung	- (4)
9. Tasen apok	- (6)
11. Songtem	- (3)
13. Ata liasü	- (5)
16. Tzünglüdenkülemitsüker	- (3)
17. Aso tila	- (6)
20. Tashi maküm	- (4)
24. Tenüng kasa jatepba	- (7)
25. Ki yangluba oset	- (4)

LANGTSÜNGLEN

1. Taksep	- (3)
2. Langtem	- (5)
3. O tamendaktak	- (4)
4. Nütü tebuba	- (3)
5. Anüngdang tesangwa	- (3)
6. Apitet	- (5)
7. Yagi jungdaksür	- (4)
8. Anogo semer ka	- (3)
10. tatsü	- (3)
12. Tebur kidong aser zünga kasa tsüngda jatepba	- (4)
14. Pela agizükba tapu ka	- (5)
15. Tenüng atet	- (3)
18. Mejanga onü	- (5)
19. Talak techira	- (4)
21. Maneri	- (3)
22. Nübo teyi	- (3)
23. Meshi	- (3)

OLONG PAITEP # 6797 TELANGZÜBA**TIPLÉN :**

1. Anitet, 4. Tola, 6. Apet, 7. Lungmi,
10. Telongjem, 15. Nuoshi,
16. Zion, 17. Ngüm, 18. Rakzük.

LANGTSÜNGLEN :

1. Asang, 2. Teti, 3. Tila, 4. Tanü,
5. Lemjem, 8. Sot, 9. Agi,
10. Tenüng, 11. Tanük, 12. Asem,
13. Aier, 14. Azük.

NAI-A YA METETTER MA

Alima nung temezüng talangtiba ayuba tetsürji Minnesota, USA nungi Diana Armstrong lir. La indang temezüng 10 prong tasazükji metre 13 tema lir aser iba atema lai Guinness World Record ka nguogo



Happy Birthday	
Tenüng	- LYDIA PONGEN
Tasoba Anogo	- 26-05-15
Küm	- 9
Class	- 3
School	- Care Well
Talidak	- 103, Kashiram, Dimapur
Lydia küm 9 tashi lendong timtem ajak nungi kümzüka aniba aser taküm nüngdakba. Anema aliba temoatsütem agütsüba Tsüngrem tenüng asanger. Aser tang nungi tali Tsüngrem aküm tsübuba taküm aser kaket shisatsü nung tajungba akümtsü. Meteta maliba, tetsür taküm lendong nungi kümzüka yuja. Taruba küm tasoba anogo tongdakjang ta aser arishi talang moajang ta sarasademsür.	
~ Temeim, Apa, Mummy, Otsü, Odi Molungti, Oko Jilo, Monglong aser Akhosa.	

Meghalaya CM-i North Garo Hills school semdang**Shillong, May 25, 2024**

Iba school yangluba nung **(Agencies):** Adokgre RMSA Higher Secondary School yangluba atema ashishitep ken o tem adokba atema Chief Minister Conrad K Sangma-i tanü semdangogo. Commissioner-i bushisüngdang ka asütsü aser aibelenba contractor tem merenhsitsü tetuyuba agütsü. CM Conrad-isä sorkar mapatongtem inyakba contractors dang mapa shitak inyaktsü metedaktsüogo.

KCP-i Manipur CCF Joykumar'er kidang bomb yuja amokmeren**Imphal, May 25, 2024**

Honibarnep 10:00 aka meta Manipur police telok kati Longjam Joykumar (58) kidangi ao. WhatsApp message ka anguba sülen Manipur police bomb detection and disposal squad-i mapang shitak nung tesem tonga ao aser Chief Conservator Joykumar'er kima nung hand grenade ka yuja aliba ajanga zülu.

Iba bomb nung "The last warning letter" ta shidi ka zülur liasü aser shidiji Kangleipak Communist Party - Noyol group ya angu.

Manipur bomb experts-i bomb raksaa endok aser parnoki ashiba agi sen meshiba dak sendakba nung iba mapa ya inyak asütsü akok.

Tripura District magistrates dang cyclone advisory agütsü**Agartala, May 25, 2024**

magistrate ajaki IMD-i ashiba sülen anidaktsü metedaktsüogo. National Disaster Management Authority (NDMA)-ia Chief Secretary, Principal Secretary (Revenue/DM) aser Relief Commissioner

"NDRF, SDRF, Tripura State Rifles, Fire & Emergency Services aser trained volunteers den osang metetpelang. Tesemtem asadangang, parnok standby nung yujang aser nüngdak süra mapa lemzükjang" ta Dr Tamal Majumder-i ashi.

Tripura nung District Department-isa DMs dang

lendenlen alirtem lendong malidaki anientsü atema tetuyuba agütsüogo.

Agartala nung IMD-i May 26 nungi 28 tashi Tripura nung Orange alerts agütsüogo.

Assam Rifles-i Kangchup nung medical camp ka ayonga agi**Imphal, May 25, 2024**

"Assam Rifles sepaitemi tanur shirangertem atema medical camp ka ayonga agi. Karam Vaiphei yimtsüng nung tanurtem aser teintet rogotem dak wara tamajung ka agi kongshi" ta Assam Rifles-i metedaktsü.

Karam Vaiphei nungeri teyari meshiba sülen Assam Rifles-i medical team ka yoka antibiotics den nüngdakba medical teyaritem agütsüogo. AR sepaitemisa basic hygiene aser sanitary practices indang temetetsütem lemsatep aser yimdakir nem sanitary items agütsü.

"Soap, sanitizers, gloves aser masks amala sanitary items agütsüogo" ta AR-isa Rifles-i medical team ka yoka metedaktsü.

Myanmar nung Rohingya nunger 45,000 shi jenshia ao



Yangon, Monupii/May 25 (Agencies): Myanmar kubok Rakhine State nung mepetmesü tali adokyonga aoba mapang Rohingya nunger 45,000 shi pei talidak ki toktsür jenshiaogo, ta United Nations-i ash.

Nisungtem tekolak tangzüka yokba, tepsetba aser kiojen balala rongtoktsuba indang osang balala angazükba mapang tang iba osang ya sangdongogo.

Arakan Army (AA)-i taoba küm Nov ember ita nungi military sorkar amak tenzükba sülen Rakhine State nung mepetmesü tulu adoker lir, aser 2021 küm military-i sorkar atsuba sülen ceasefire benoka aliba tembangdaktsiogo. Iba rara ajanga nütsüng agi ajema aliba Muslim Rohingya nungertem akoksar, shirnok sorkar mesüra telungpurtemi bendanger ta züngshir.

AA-i ashiba agi, parnok state nung Rakhine nunger atema tashi tali meshia rara. Iba state nung Rohingya Muslim nunger 600,000 nung lir, shirnoki linük toktsür maotsü atema telemtetba agia liasü.

Rakhine nungi jena aoba sülen Rohingya nunger million ka dak tema kidanger Bangladesh nung jenoka lir, kong 2017 küm military-i-jenjang agiba sülen meyirejang noklang aika jena aoba densema lir. Iba ken o ya tang United Nations genocide court case ka kümogo.

UN rights office otongdar Elizabeth Throssell-i Hokolbarnü Geneva nung ashiba agi, Buthidaung aser Maungdaw jila nung tawa kanga sashia ratarepa ajanga civilian

meyirejang aika jenshiaogo.

"Rohingya nunger 45,000 shi tekümzükba bushia Bangladesh den arrtsü nung Naf ayong anasa tesem kati jenaogo," ta lai ashiba den international temzüng ozüng dak ajemdaker civilian tem nem tekümzükba agütsütsü mepeshia metedaktsiogo.

UN rights tekolakba Volker Turk-i, Bangladesh dang tanga linüktem den international temzüng ozüng dak ajemdaker tekümzükba bushirtem nem tekümzükba agütsütsü mepeshia metedaktsiogo, ta laisa shisem.

Ajisüaka Bangladesh kubok Cox's Bazar nungi Al Jazeera osangbener Tanvir Chowdhury-i ashiba agi, Bangladesh nung Rohingya nunger million ka dak tema jenoka lir, anungji sorkari refugee talila agizüktsü memulunger, aser ibayogji refugee tem Myanmar tsütsü taolen makai sabanger lir.

Myanmar team rights office tekolakba James Rodehaver-i, nisungtem aika jenshia aoba indang rasa ash.

Paisa, par team-i kuli balala agütsüba aser satellite noksa, online video aser noksatem nguogo aser item ajanga Buthidaung jila tuluba ka rongtoker aliba ngutetogo, ta ashi.

"Military iba tesem nungi atsünginba sülen anogo ana lir Jila ya May 17 nü nungi rongtoktsü tenzük ta osang angazükogo aser Arakan Army-i iba yimtsüng ajunga azüokba sangdongogo, ta pai ashi.

Jila nungi jena aoer kati ashiba agi, pa Buthidaung

toktsür jena aoba mapang tasümg aika anguba lemsatep aser tangartemi ashiba agi, jila toktsür jena aoer meyirejang aika ya Maungdaw jila nung ao Arakan Army-i nokdang liasü.

Maneni lendong nungi jenbortemi ashiba agi, Rohingya nunger yimtsüngtemi jena aotsü merangba mapang AA züngsemtemi parnok mezüngmeshia amshi aser senotsü rakzükrakdema liasü.

Buthidaung merongtoktsü tsüngda hopta ka jelia Rodehaver-i ashiba agi, northern Rakhine nung AA aser military napronglai asendenshir Rohingya nunger amakba indang rights office-i mangaoker liasü.

Iba team yagi nisung pezü tekolak tangzüka yokba mangaoka lir, ta pai ashiba den, iba inyakyim ya AA-i benoka inyak ta kanga temulung lema bilemer.

Kasa mapag nung taoba mapang Rohingya nunger ya jong ama amshiba indang taitsüba adokogo.

Al Jazeera osangbener Chowdhury-i ashiba agi, Rohingya nungertem ya teyongtsü nung sabanger lir.

"Parnok jenjang kanga mejungi lir," ta pai ashiba den, Myanmar toktsür jena aoba Rohingya nunger refugee temi ashiba agi, AA aser military napronglai parnok tenüng nung raratsü atema Rohingya nungertem anisemtsü meranga arudar.

"Parnok medenra parnok yimtsüngtem rongtoktsütsü ta amokmerena arudar," ta paisa shisem.



Helicopter tsükoka lendong ka nung asüba sülen tir Ebrahim Raisi Brehostibarnü Iran nunger atema temeshi yimi Mashhad nung remtsüogo, kong mangyimer meyirejang aika adenshia liasü. Azerbaijan anütoklen hydro project ka lapoktsuba sülen Tabriz yimi nung oil refinery ka lapoktsütsü atema oya aliba mapang Raisi mena aliba helicopter ya tenem ka nung tsükoka liasü.

Italy-i maneni Gaza atema UNRWA nem senotsü teyari agütsütsü

Rome, Monupii/May 25 (Agencies): Italy sorkari sangdong ka ajanga parnoki United Nations agency for Palestinian refugees (UNRWA) nem senotsü teyari agütsütsü ta metedaktsiogo.

October 7 nü Israel amakba nung UN staff tema sendaka lir ta Israel sorkari ashiba sülen Italy-i UNRWA nem teyari agütsüba anen, aser ita ishika lir tang ano teyari maneni agütsütsü telemtetba agiogo.

UNRWA inyakyim asadanga sülen anüolen aliba linüktem den Rome-ia teyari agütsütsü telemtetba agiogo. Iba ken o dak sendakba nung Israel-i kuli kecha magütsüba taoba France foreign minister Catherine Colonna-i anir ketdangsürtemi ngutetogo.

October 7 nü nungi Israel-i Gaza amak tenzük, aser tang tashi nung Palestine nunger 35,000 dak tema tepsetogo. Hamas puri Israel amakba mapang nisung 1,100 tepset aser nsung 250 shi pur oa liasü.

Ita ti jungnüsü raraba sülen Gaza kanga mejungi raksao.

United States aser European Union densema teyari agütsür tongtitemi teyari agütsü tenzükogo, kechiyong Gaza nung nüburtem jenjang kanga mejungi kümogo aser ano Israel-i teyari agütsütsü atema

tenokdangba agütsüba ajanga tensa tamajungba kündaktsiogo.

"Italy-i Palestine nunger refugee tem nem teyari agütsütsü atema project kar asoshi senotsü teyari agütsütsü telemtetba agiogo, ajisüaka sen ka danga kiralongartem nem magütsütsü ta nangzükba sülenang agütsütsü," ta Antonio Tajani-i Palestine Ato Kilonser Mohammad Mustafa dang Honibarnü senden amenba mapang ash.

Tajani-isa, pai Palestine PM dang "sorkari Palestine nunger atema senotsü teyari euro million 35 agütsütsü," ta shiogo, ta metedaktsü.

"Million pongu UNRWA nem agütsütsü," ta pa ashiba den tanungba euro million 30 ya Italy indang "Food for Gaza" inyakyim nem agütsütsü, ta metedaktsü.

Mustafa-i Rome semdanga mapang Itary Ato Kilonser Giorgia Meloni den sensaksemogo aser Italy PM-i, Gaza nung teti atema ceasefire benoktsü Rome-i pusemba, Hamas-i pua aliba Israel nungertem chioktsüba aser Gaza nung alirtem nem humanitarian teyari agütsütsü bendanga agütsür aliba lemsatepogo, ta PM office sangdong ka ajanga metedaktsü.

US-i Ukraine nem USD million 275mn military teyari agütsütsü

Washington, Monupii/May 25 (Agencies): United States-i Hokolbarnü sangdong ka ajanga Ukraine nem injang, missile, mine aser artillery round densema military teyari balala agütsütsü telemtetba agiba metedaktsiogo.

May 10 nü Russia nunger sepai meyirejang aika arrtsü adena aitba sülen Kharkiv kümzüka ayutsü atema Ukraine rara arudar. Ita 18 tsüngda tang mezüngbuba Russia nunger sepaitem aika arrtsü adena arua amak tenzükogo.

"Linük kümzüka ayutsü atema Ukraine nungertem kanga tasüta raraba mapang ka nung Ukraine nem prangbong injang aser hadir balala agütsütsü atema United States-i tanü sangdunger," ta Secretary of State Antony Blinken-i ash.

"USD 275 alang package, koba Russia-i Kharkiv temeket amakba nokdangtsü atema Ukraine nem teyari agütsüba nung shilem ka lir, iba package nung jongdak nüngdakba hadirtem densema lir," ta paisa ashi.

Prangbong injang aser hadirtem rongnung HIMARS, 155mm aser 105mm artillery rounds, 60mm mortar rounds, Tube-Launched, Optically-

Tracked, Wire-Guided (TOW) missiles, Javelin aser AT-4 anti-armor systems, precision aerial munitions, small arms aser small arms ammunition talila aser grenades, demolitions munitions, anti-armor mines, equipment tem recover asütsü asoshi tactical vehicles, helmets, body armor, aser chemical, biological, radiological, nuclear protective equipment, aser spare parts, maintenance, aser tanga ancillary equipment densema lir.

Taoba ita US nung ozüng yanglurtemi mapang talangka bangdaker aliba USD billion 61 alang military package ka agizükogo. Iba sülen US tir-i Ukraine nem military teyari agütsütsü atema ponguben tashi tetuyuba balala agütsüogo.

"Taoba package nung teyari agütsübatem raraba tesem tongogo aser teyari tasenba takaratiba nung yoktsü," ta Blinken-i ash.

Ukraine nung yimti tulutem rongnung tanabuba Kharkiv nung Brehostibarnü nisung tenet tepsetogo, ta local ketdangsürtemi metedaktsü.

Russia-i iba yimti temeket amak tenzükba sülen nisung 11,000 dak tema iba tesem toktsür jenshiaogo, ta local governor Oleg Synegubov-i ash.

India tetsür compound archery team-i gold angu



Archery World Cup nung India tetsür compound team nung Jyothi Surekha Vennam, Parneet Kaur aser Aditi Swami nungeri gold medal angubo noksa nung angur.

Minupii/May 25, 2024

(Agencies): Yecheon (South Korea) nung Honibarnü Archery World Cup nung India tetsür compound team nung Jyothi Surekha Vennam, Parneet Kaur aser Aditi Swami nungeri gold medal angu aser tarep temeyoktep team-i silver medal ngua liasü.

World number one India team-i final asaya nung Turkey team nungi Hazal Burun, Ayse Bera Suzer aser Begum Yuva nunger tetenzük nungi amokbanger asaya aser set ka nung danga tamakok mongui asaya 232-226 agi ayong ayonga koka liasü.

Jyothi, Parneet aser world champion Aditi nunger senteper World Cup nung gold medal asembuba ngutetogo.

Parnoki taoba ita Shanghai nung World Cup Stage 1 final nung gold angu aser taoba kuma Paris nung World Cup stage 4 nung gold medal ngur liasü.

Ajisüaka Asian Games champion Jyothi-i tanabuba gold medal angutsü aliba maongka

magitet, kechiyong la aser Priyansh nati compound temeyoktep team asaya final nung USA nunger tarep Dean aser Sawyer Sullivan na point (155-153) ana agi mekoki liasü.

Compound tetsür team final nung second seeded Indian team-i X nung asemen kashia tenzük aser iba sülen arrow asemen akhaba mapang point kaka agi tajemba ngua mezüngbuba round nung point ka agi takok ngua liasü.

Tanabuba round nung arrow trok akhaba mapang India tsürtemi X nung anabae khashiba densema perfect 10s pongu angu aser 9 nung khen kashia parnok point pezü agi tejakdang aküm.

Tasembuba round nung Turkey team-ia junga asaya 10s nung pezüben kashia India den point kasasa (58) aküm. Ajisüaka round pezübübai aiba mapang India team point pezü agi tejakdang liasü.

Tatembangbuba round nunga India team-i point 38 ngua parnok aser akok.

Compound temeyoktep team asaya final nung USA team-i asaya mekoki aliba meyipa tur takok ngua liasü.

Jyothi aser Priyansh nati mezüngbuba round nung point 39 ngua tena point ana agi tejakdang liasü, ajisüaka tanabuba round nung tenati junga masayatet aser meyiper Olivia o Sullivan nati kanga junga asaya point 39 angu aser team ana point kasasa (76) aküm.

Tasembuba round nung USA team-i point 40 ngua parnok India dang nungi point ka agi timba aküm.

Tatembangbuba round nung shoot-off asayatsü atema Jyothi aser Priyansh nati perfect 40 angutsü nüngdaka liasü saka tenati point 38 dang ngutet aser USA team-i point 39 ngua asaya akok.

Kasa mapang nung kija asaya nung bronze medal atema asayaba mapang Prathamesh Fuge-i World No 1 Netherlands nunger Mike Schloesser shoot-off nung mekoki liasü.

sangdongogo.

Pakistan team taküm T20 World Cup nung mezüngbuba asaya June 6 nü hosts USA den Grand Prairie Cricket Stadium, Dallas nung asayatsü.

Iba sülen parnok Nassau County International Cricket Stadium, New York-i aotsü kong parnok India team den June 9 nü asayatsü.

Maneni parnok June 11 aser 16 nü Canada aser Ireland na den asayatsü.

Pakistan team:

Babar Azam (captain), Abrar Ahmed, Azam Khan, Fakhar Zaman, Haris Rauf, Iftikhar Ahmed, Imad Wasim, Mohammad Abbas Afridi, Mohammad Amir, Mohammad Rizwan, Naseem Shah, Saim Ayub, Shadab Khan, Shaheen Shah Afridi, Usman Khan



saka pa taruba asayatem nung tajungba kuma aotsü imlar, kechiyong T20 World Cup nung pa tanga strike bowler tem den kanga tongtibang asütsü," ta Pakistan Cricket Board-i ashi.

Hopta ishika tejakdang Pakistan Cricket board-i, red-ball format atema Pakistan cricket team coach asütsü Jason Gillespie aser white-ball asaya atema coach mapa abentsü Gary Kirsten shimba

Malaysia Masters: PV Sindhu final-i iogo

Monupii/May 25, 2024

(Agencies): Olympics nung medal ana tashi ngur alila P V Sindhu-i Honibarnü USD 420,000 Malaysia Masters tetsür kija asaya semifinal nung tesülen nungi meyipa tur Thailand tsür Busanan Ongbamrungphan koka final-i iogo.

Fifth seed Sindhu, shibai küm ana tsüngda asayamung ka danga koka mali, lai iba asaya 13-21 21-16 21-12 agi world number 20 Busanan madak takok ngua liasü. Tena tsüngda minute 88 asaya liasü.

Sindhu-i 2022 küm Singapore Open kokogo aser taoba küm Madrid Spain Masters nung tanabuba jenjang nung tembanga liasü

Lai tang agi 18benbuba

Busanan madak takok nguogo. Busanan-i la indang career nung 2019 Hong Kong Open nung dang Sindhu koka lir.

World No. 15 Sindhu, shiba Paris Games nung Olympic medal tasembuba angutsü merangdar, la final nung China tsür world no. 7 asaya Wang Zhi Yi den asayatsü.

Sindhu-i taoba küm Arctic Open nunga Wang makok, saka lai tena tsüngda asemen asayaba anabenbo koker lir.

Sindhu shiba yiruba sülen mapang tatsüka junga masayateti aruogo, lai hopta tepeyong junga asayaogo.

Sindhu-i joko mapang



PV Sindhu

tatsüka Carolina Marin, Tai Tzu Ying, Chen Yu Fei aser Akane Yamaguchi nunger amala asayar tajungtemmekoki arudar aser la parnok den Paris Olympics nungbo asayatsü imlar. Iba asayamung nung takok anguba ajanga Olympics masaya tsüngda lasasa dak temulung tali lema akümtsü.

Sindhu-i Busanan aiben koka lir, saka Honibarnü semifinal asaya nung kanga toktepa asayaogo. Semifinal nung mezüngbuba asaya ya Thailand tsürla yagi amokbanger asaya liasü.

Mezüngbuba game ya Busanan-i amokbanger asaya ajisüaka decider asayaba mapang lai court kanga junga amokbanga masayatet aser kasa mapang nung Sindhu-bo tajungba tajungba asayayonga ao.

Decider asayaba mapang Sindhu-i match points-i ti angu aser iba sülen asaya 21-12 agi ayong ayonga koka liasü.

World Para Athletics: Simran-i 200m T12 nung gold angu

Monupii/May 25, 2024

(Agencies): World Para Athletics Championships nung Honibarnü Simran Sharma-i tetsür 200m T12 asaya nung alizing 24.95 seconds nung tongteta India atema gold medal trokbuba nguogo.

Iba asaya nung Dominica tsür Darlenys De La Severino (25.08) aser Lorraine Gomes De Aguiar (25.40) nati silver aser bronze medal ngua liasü.

T12 category ya tenük nung timtem aliba asayartem atema lir. Iba asaya nung asayartem nokdaker asayar.

"Pa (Herath) kanga junga masadang aser pa F 46 category nungi asayatsü temsüa maliasü," ta Paralympic Committee of India ketdangsü kati ashi.

Iba sülen Herath disqualify sütsü. Riku (62.77m) shiba tasembuba jenjang nung tembanga liasü pa tanabubai tudaktsü aser Ajeet (62.11m) nem bronze medal agütsü.

India team-i taküm tajungba asayatetogo aser 2023 küm Paris nung medal (3 gold, 4 silver & 3 bronze) 10 ngua otsü tasen yanglur aliba taküm iba asayamung nung ajatetogo.

BILEMDANGANG

"Tangar takok dang nükshia melei pei kechi akoker aji meranga inyaktsüla."

T20 World Cup atema Pakستان team sangdongogo

Monupii/May 25, 2024

(Agencies): Pakistan Cricket board-i Hokolbarnü sangdong ka ajanga taruba T20 World Cup atema asayar 15 shimba sangdongogo. Iba team ya Babar Azam-i anir asayatsü.

Asayar 15 rongnung Abrar Ahmed, Azam Khan, Mohammad Abbas Afridi, Saim Ayub aser Usman Khan nunger tang mezüngbuba T20 World Cup nung asayatsü atema shimogo aser kasa mapang nung Mohammad Amir aser Imad Wasim na tatemsia 2016 aser 2021 küm T20 WC nung asayar lir. Tanungba asayar ti ya 2022 küm Australia nung World Cup nung asayaogo.

"Haris Rauf tanepstsü kanga junga nguogo aser net nung ball ondar. Pa Headingley nung khen danga asayanung jungla,